

CANTICUM CANTICORUM

Capitulum: **1** 2 3 4 5 6 7 8

CAPITULUM 1

- ² (1:1) osculetur me osculo oris sui quia meliora sunt ubera tua vino
- ³ (1:2) fragrantia unguentis optimis oleum effusum nomen tuum ideo adolescentulae dilexerunt te
- ⁴ (1:3) trahe me post te curremus introduxit me rex in cellaria sua exultabimus et laetabimur in te memores uberum tuorum super vinum recti diligunt te
- ⁵ (1:4) nigra sum sed formosa filiae Hierusalem sicut tabernacula Cedar sicut pelles Salomonis
- ⁶ (1:5) nolite me considerare quod fusca sim quia decoloravit me sol filii matris meae pugnauerunt contra me posuerunt me custodem in vineis vineam meam non custodivi
- ⁷ (1:6) indica mihi quem diligit anima mea ubi pascas ubi cubes in meridie ne vagari incipiam per greges sodalium tuorum
- ⁸ (1:7) si ignoras te o pulchra inter mulieres egredere et abi post vestigia gregum et pasce hedos tuos iuxta tabernacula pastorum
- ⁹ (1:8) equitui meo in curribus Pharaonis adsimilavi te amica mea
- ¹⁰ (1:9) pulchrae sunt genae tuae sicut turturis collum tuum sicut monilia
- ¹¹ (1:10) murenulas aureas faciemus tibi vermiculatas argento
- ¹² (1:11) dum esset rex in accubitu suo nardus mea dedit odorem suum
- ¹³ (1:12) fasciculus murrae dilectus meus mihi inter ubera mea commorabitur
- ¹⁴ (1:13) botrus cypri dilectus meus mihi in vineis Engaddi
- ¹⁵ (1:14) ecce tu pulchra es amica mea ecce tu pulchra oculi tui columbarum
- ¹⁶ (1:15) ecce tu pulcher es dilecte mi et decorus lectulus noster floridus
- ¹⁷ (1:16) tigna domorum nostrarum cedrina laquearia nostra cypressina

CAPITULUM 2

Ego flos campi et lilium convallium

- ² sicut lilium inter spinas sic amica mea inter filias
- ³ sicut malum inter ligna silvarum sic dilectus meus inter filios sub umbra illius quam desideraveram sedi et fructus eius dulcis gutturi meo
- ⁴ introduxit me in cellam vinariam ordinavit in me caritatem
- ⁵ fulcite me floribus stipate me malis quia amore langueo
- ⁶ leva eius sub capite meo et dextera illius amplexabitur me

- ⁷ adiuro vos filiae Hierusalem per capreas cervosque camporum ne suscitatis neque evigilare faciatis dilectam quoadusque ipsa velit
- ⁸ vox dilecti mei ecce iste venit saliens in montibus transiliens colles
- ⁹ similis est dilectus meus capreae hinuloque cervorum en ipse stat post parietem nostrum despiciens per fenestras prospiciens per cancellos
- ¹⁰ et dilectus meus loquitur mihi surge propera amica mea formonsa mea et veni
- ¹¹ iam enim hiemps transiit imber abiit et recessit
- ¹² flores apparuerunt in terra tempus putationis advenit vox turturis audita est in terra nostra
- ¹³ ficus protulit grossos suos vineae florent dederunt odorem surge amica mea speciosa mea et veni
- ¹⁴ columba mea in foraminibus petrae in caverna maceriae ostende mihi faciem tuam sonet vox tua in auribus meis vox enim tua dulcis et facies tua decora
- ¹⁵ capite nobis vulpes vulpes parvulas quae demoliuntur vineas nam vinea nostra floruit
- ¹⁶ dilectus meus mihi et ego illi qui pascitur inter lilia
- ¹⁷ donec adspiret dies et inclinentur umbrae revertere similis esto dilecte mi capreae aut hinulo cervorum super montes Bether

CAPITULUM 3

- I**n lectulo meo per noctes quaesivi quem diligit anima mea quaesivi illum et non inveni
- ² surgam et circuibo civitatem per vicos et plateas quaeram quem diligit anima mea quaesivi illum et non inveni
- ³ invenerunt me vigiles qui custodiunt civitatem num quem dilexit anima mea vidistis
- ⁴ paululum cum pertransissem eos inveni quem diligit anima mea tenui eum nec dimittam donec introducam illum in domum matris meae et in cubiculum genetricis meae
- ⁵ adiuro vos filiae Hierusalem per capreas cervosque camporum ne suscitatis neque evigilare faciatis dilectam donec ipsa velit
- ⁶ quae est ista quae ascendit per desertum sicut virgula fumi ex aromatibus murrae et turis et universi pulveris pigmentarii
- ⁷ en lectulum Salomonis sexaginta fortes ambiunt ex fortissimis Israhel
- ⁸ omnes tenentes gladios et ad bella doctissimi uniuscuiusque ensis super femur suum propter timores nocturnos
- ⁹ ferculum fecit sibi rex Salomon de lignis Libani
- ¹⁰ columnas eius fecit argenteas reclinatorium aureum ascensum purpureum media caritate constravit propter filias Hierusalem
- ¹¹ egredimini et videte filiae Sion regem Salomonem in diademate quo coronavit eum mater sua in die dispensionis illius et in die laetitiae cordis eius

CAPITULUM 4

- Q**uam pulchra es amica mea quam pulchra es oculi tui columbarum absque eo quod intrinsecus latet capilli tui sicut greges caprarum quae ascenderunt de monte Galaad
- ² dentes tui sicut greges tonsarum quae ascenderunt de lavacro omnes gemellis fetibus et sterilis non est inter eas

- ³ sicut vitta coccinea labia tua et eloquium tuum dulce sicut fragmen mali punici ita genae tuae absque eo quod intrinsecus latet
- ⁴ sicut turris David collum tuum quae aedificata est cum propugnaculis mille clypei pendent ex ea omnis armatura fortium
- ⁵ duo ubera tua sicut duo hinuli capreae gemelli qui pascuntur in liliis
- ⁶ donec adspiret dies et inclinentur umbrae vadam ad montem murrae et ad collem turis
- ⁷ tota pulchra es amica mea et macula non est in te
- ⁸ veni de Libano sponsa veni de Libano veni coronaberis de capite Amana de vertice Sanir et Hermon de cubilibus leonum de montibus pardorum
- ⁹ vulnerasti cor meum soror mea sponsa vulnerasti cor meum in uno oculorum tuorum et in uno crine colli tui
- ¹⁰ quam pulchrae sunt mammae tuae soror mea sponsa pulchriora ubera tua vino et odor unguentorum tuorum super omnia aromata
- ¹¹ favus distillans labia tua sponsa mel et lac sub lingua tua et odor vestimentorum tuorum sicut odor turis
- ¹² hortus conclusus soror mea sponsa hortus conclusus fons signatus
- ¹³ emissiones tuae paradisus malorum punicorum cum pomorum fructibus cypri cum nardo
- ¹⁴ nardus et crocus fistula et cinnamomum cum universis lignis Libani murra et aloe cum omnibus primis unguentis
- ¹⁵ fons hortorum puteus aquarum viventium quae fluunt impetu de Libano
- ¹⁶ surge aquilo et veni auster perfla hortum meum et fluant aromata illius

CAPITULUM 5

- V**eniat dilectus meus in hortum suum et comedat fructum pomorum suorum veni in hortum meum soror mea sponsa messui murrā meam cum aromatibus meis comedi favum cum melle meo bibi vinum meum cum lacte meo comedite amici bibite et inebriamini carissimi
- ² ego dormio et cor meum vigilat vox dilecti mei pulsantis aperi mihi soror mea amica mea columba mea immaculata mea quia caput meum plenum est rore et cincinni mei guttis noctium
- ³ expoliavi me tunica mea quomodo induar illa lavi pedes meos quomodo inquinabo illos
- ⁴ dilectus meus misit manum suam per foramen et venter meus intremuit ad tactum eius
- ⁵ surrexi ut aperirem dilecto meo manus meae stillaverunt murra digiti mei pleni murra probatissima
- ⁶ pessulum ostii aperui dilecto meo at ille declinaverat atque transierat anima mea liquefacta est ut locutus est quaesivi et non inveni illum vocavi et non respondit mihi
- ⁷ invenerunt me custodes qui circumeunt civitatem percusserunt me vulneraverunt me tulerunt pallium meum mihi custodes murorum
- ⁸ adiuro vos filiae Hierusalem si inveneritis dilectum meum ut nuntietis ei quia amore langueo
- ⁹ qualis est dilectus tuus ex dilecto o pulcherrima mulierum qualis est dilectus tuus ex dilecto quia sic adiurasti nos
- ¹⁰ dilectus meus candidus et rubicundus electus ex milibus

- ¹¹ caput eius aurum optimum comae eius sicut elatae palmarum nigrae quasi corvus
- ¹² oculi eius sicut columbae super rivulos aquarum quae lacte sunt lotae et resident iuxta fluentia plenissima
- ¹³ genae illius sicut areolae aromatum consitae a pigmentariis labia eius lilia distillantia murram primam
- ¹⁴ manus illius tornatiles aureae plenae hyacinthis venter eius eburneus distinctus sapphyris
- ¹⁵ crura illius columnae marmoreae quae fundatae sunt super bases aureas species eius ut Libani electus ut cedri
- ¹⁶ guttur illius suavissimum et totus desiderabilis talis est dilectus meus et iste est amicus meus filiae Hierusalem

CAPITULUM 6

(5:17)

Quo abiit dilectus tuus o pulcherrima mulierum quo declinavit dilectus tuus et quaeremus eum tecum

² (6:1) dilectus meus descendit in hortum suum ad areolam aromatis ut pascatur in hortis et lilia colligat

³ (6:2) ego dilecto meo et dilectus meus mihi qui pascitur inter lilia

⁴ (6:3) pulchra es amica mea suavis et decora sicut Hierusalem terribilis ut castrorum acies ordinata

⁵ (6:4) averte oculos tuos a me quia ipsi me avolare fecerunt capilli tui sicut grex caprarum quae apparuerunt de Galaad

⁶ (6:5) dentes tui sicut grex ovium quae ascenderunt de lavacro omnes gemellis fetibus et sterilis non est in eis

⁷ (6:6) sicut cortex mali punici genae tuae absque occultis tuis

⁸ (6:7) sexaginta sunt reginae et octoginta concubinae et adolescentularum non est numerus

⁹ (6:8) una est columba mea perfecta mea una est matris suae electa genetrici suae viderunt illam filiae et beatissimam praedicaverunt reginae et concubinae et laudaverunt eam

¹⁰ (6:9) quae est ista quae progreditur quasi aurora consurgens pulchra ut luna electa ut sol terribilis ut acies ordinata

¹¹ (6:10) descendi ad hortum nucum ut viderem poma convallis ut inspicerem si florisset vinea et germinassent mala punica

¹² (6:11) nescivi anima mea conturbavit me propter quadrigas Aminadab

¹³ (6:12) revertere revertere Sulamitis revertere revertere ut intueamur te

CAPITULUM 7

Quid videbis in Sulamiten nisi choros castrorum quam pulchri sunt gressus tui in calciamentis filia principis iunctura feminum tuorum sicut monilia quae fabricata sunt manu artificis

² umbilicus tuus crater tornatilis numquam indigens poculis venter tuus sicut acervus tritici vallatus liliis

- ³ duo ubera tua sicut duo hinuli gemelli capreae
⁴ collum tuum sicut turris eburnea oculi tui sicut piscinae in Esebon quae sunt in porta filiae multitudinis nasus tuus sicut turris Libani quae respicit contra Damascum
⁵ caput tuum ut Carmelus et comae capitis tui sicut purpura regis vincta canalibus
⁶ quam pulchra es et quam decora carissima in deliciis
⁷ statura tua adsimilata est palmae et ubera tua botris
⁸ dixi ascendam in palmam adprehendam fructus eius et erunt ubera tua sicut botri vineae et odor oris tui sicut malorum
⁹ guttur tuum sicut vinum optimum dignum dilecto meo ad potandum labiisque et dentibus illius ruminandum
¹⁰ ego dilecto meo et ad me conversio eius
¹¹ veni dilecte mi egrediamur in agrum commoremur in villis
¹² mane surgamus ad vineas videamus si floruit vinea si flores fructus parturiunt si floruerunt mala punica ibi dabo tibi ubera mea
¹³ mandragorae dederunt odorem in portis nostris omnia poma nova et vetera dilecte mi servavi tibi

CAPITULUM 8

- Q**uis mihi det te fratrem meum sugentem ubera matris meae ut inveniam te foris et deosculer et iam me nemo despiciat
² adprehendam te et ducam in domum matris meae ibi me docebis et dabo tibi poculum ex vino condito et mustum malorum granatorum meorum
³ leva eius sub capite meo et dextera illius amplexabitur me
⁴ adiuro vos filiae Hierusalem ne suscitatis et evigilare faciatis dilectam donec ipsa velit
⁵ quae est ista quae ascendit de deserto deliciis affluens et nixa super dilectum suum sub arbore malo suscitavi te ibi corrupta est mater tua ibi violata est genetrix tua
⁶ pone me ut signaculum super cor tuum ut signaculum super brachium tuum quia fortis est ut mors dilectio dura sicut inferus aemulatio lampades eius lampades ignis atque flammaram
⁷ aquae multae non poterunt extinguere caritatem nec flumina obruent illam si dederit homo omnem substantiam domus suae pro dilectione quasi nihil despicient eum
⁸ soror nostra parva et ubera non habet quid faciemus sorori nostrae in die quando adloquenda est
⁹ si murus est aedificemus super eum propugnacula argentea si ostium est conpingamus illud tabulis cedrinis
¹⁰ ego murus et ubera mea sicut turris ex quo facta sum coram eo quasi pacem repperiens
¹¹ vinea fuit Pacifico in ea quae habet populos tradidit eam custodibus vir adfert pro fructu eius mille argenteos
¹² vinea mea coram me est mille tui Pacifice et ducenti his qui custodiunt fructus eius
¹³ quae habitas in hortis amici auscultant fac me audire vocem tuam
¹⁴ fuge dilecte mi et adsimilare capreae hinuloque cervorum super montes aromatum